

上清大洞真经卷之六

- [扶桑大帝九老仙皇君道经第三十五](#)
- [小有玉真万华先生主图玉君道经第三十六](#)
- [玄洲二十九真伯上帝司禁君道经第三十七](#)
- [太元晨中君峨眉洞室玉户太素君道经第三十八](#)
- [九灵真仙母青金丹皇君道经第三十九](#)
- [徊风混合帝一秘诀](#)

扶桑大帝九老仙皇君道经第三十五

“扶桑大帝九老仙皇君道经第三十五

上清大洞真经卷之六

茅山上清三十八代宗师蒋宗瑛校勘

上玄元父章

谨请上玄元父高同生，字左回明；下玄玄母叔火王，字右回光；帝皇太一重冥空，字幽寥无；九帝尊神日明真，字众帝生；太帝精魂阳堂玉，字八灵；天帝九关魂绿徊道，字绝冥；天纪帝魂照无阿，字广神。七神常守兆本命之根胞胎大结，常令胞囊玉明，胎结开清，七祖反胎，兆命长生，三天同符，上与日并。佑我死炁三十九门，太一尊神备守致真，口衔日光，手执月明，照兆死户，使兆长生，我体自在，常诵洞经金音，令仰充上入太无庭，解结散祸积，披脱七祖灵，反胎会南宫，仙都有玉名，三涂灭罪根，轮转登上清。

真思混合莲华七色神云，罩于顶上，乃默呪曰：

元父玄母，七真齐炁，神公太帝，九老并位，为我固生，拔度十界，日月同符，九帝合契，坐命天魔，万灵来拜，浮景三举上，震文保亿世。



次思七色莲华之炁从兆泥丸中入，兆乃口吸神云，咽津七过，每念一名则咽一过。先念元父，次玄母，次帝皇，次九帝尊，次大帝精魂，次天帝九关魂，次天纪帝魂，结作七神，布心下脐上。上玄元父袞冕，骑狮子，六人衣冠侍立，顺时吐息。

诵玉经。

大洞玉经曰

太帝九老京山名，校仙登扶桑，七转召天帝，司命乘神纲，五岳启灵户，传声大魔王，河海皆受事，立尔应会方台名，保符泥丸内，守神曰桃康，徊明阳神易死籍，记仙阴神叔火王，拔绝三涂疾，去祸生上英精液君，七玄登朱室，兆身会玉堂，上友方盈子君子神，下携理维藏精魂，左摄明车君黄炁君，右辅归盛昌太一别字，混一玉京炁，化兆反婴童。

高上消魔玉清王祝曰

太玄聚晖，映冠扶晨，大帝变景，须臾混分，入兆五府，坚我玉根，双駟太一，合羽扬轮，与兆上升，回转金门，年同日德，体得金仙，世世昌盛，真符流连，玄玄累叶，名书灵轩，羽籍紫庭，飞香奏烟，福连百枝，庆流溢门。


毕，乃口微祝曰：

天上内音，盈劫连，邕玉升。

地上外音，车离苦，去百毒。

大洞上玄元父消魔玉符

诀曰：当青书白缯，佩之，存呼元父内讳名字，镇我本命之根。乃叩齿七通，咽液七过。



小有玉真万华先生主图玉君道经第三十六

“小有玉真万华先生主图玉君道经第三十六

上清大洞真经卷之六

茅山上清三十八代宗师蒋宗瑛校勘

三素老君章

谨请三素老君牢张上，字神生道；正一左仙仲成子，字西华；正一右仙曲文子，字灵和，常守兆鼻下人中死炁之门，使兆人中真一抚闲于紫房，灵炁金光散曜于子户，三晨并位于绿室，七玄超生于玉堂，七祖受福，上升南宫。

真思三素老君牢张上、正一左仙仲成子、正一右仙曲文子真炁，混九玄白黄三色之云，罩于顶上，乃默呪曰：

玉真生帝景，万华乘云发，三老辅二仙，共镇死户窟，神映七华生，朽骨蒙更蜕，超逸三界庭，五苦咸解脱，得入九天表，上朝高朱日。



次思三色之炁从兆泥丸中入，兆乃口吸神云，咽津五过，结作五神，三老君青黄白三色衣，及二星官，共五神，下布绛官，穿尾闾穴，穿脊骨，上入泥丸，下布鼻下人中之户，顺时吐息。

诵玉经。

大洞玉经曰

玉真万华宫官名，高仙藏帝经，主图九天表，洞观无中生，七转召万神，五岳一来庭，三官招众魔，司录校所呈，拔籍重泉曲，记仙书上清，七世解牢结，秽血悉沉零，反胎朱火室，更受洞中生，伯史丹田神卫神躯，令我保黄宁。

高上神霄玉清王祝曰

命门合精，六混七分，太一把籍，司命理神，帝一固形，无英守魂，大回紫房，奉符帝君，胞树伐绝，断灭血根，七玄更起，沉景生烟，兆得上升，化合帝晨，身映日月，命与天连，重华累晖，咸会上尊，世书灵羽篆名，紫篆内宣，乘景三素，北宴高元，号曰仙王，上清真人。


毕，乃口微祝曰：

天上内音，合帝伯，方超凝。

地上外音，理生来，福田延。

大洞三素老君消魔玉符

诀曰：当黄书白绡佩之，存呼老君内讳名字，镇我鼻下人中，备卫我身，身得长存，我形升飞，七祖皆仙，上登南官，奉谒帝晨。乃叩齿三通，咽液三过。



玄洲二十九真伯上帝司禁君道经第三十七

“玄洲二十九真伯上帝司禁君道经第三十七

上清大洞真经卷之六

茅山上清三十八代宗师蒋宗瑛校勘

五帝章

谨请北方黑帝保成昌，字北伐，守兆两膀胱之中；西方白帝彰安幸，字西华，守兆阴囊之中；南方赤帝长来觉，字南和，守兆口舌之内；东方青帝雕梁际，字青平，守兆五藏之外；中央黄帝含光露，字中细，守兆脾胃之中；玄一老子林虚夫，字灵时道，守兆阴茎之端。一老五帝，备卫本命，守兆身形，使七祖解考，福祚九玄，宿罪解结，散除胞根，即使胎精血光，化为金液玉泉，上生南宫，以为帝宾，我入八景，回驾琼轮，仰升九天，白日飞仙。

真思五色神云，罩于顶上，默呪曰：

五帝明真，辅仙玄伯，上帝景晖，吐灵敷席，翳翳神曜，徘徊重幕，羽景宝录，太一命籍，五炁总魂，三精固魄，金仙练容，停年反白，拔出幽根，日月同宅。



次思五色之炁从兆泥丸中入，兆乃口吸神云，咽津分作六过，每一咽结一神。第一咽北帝，黑云下布左右膀胱之中，出于后心。二咽西帝，白云下布阴囊之中，出于右肩，神顶戴月光。三咽南帝，赤云下布口舌之中，出于发际下一寸。四咽东帝，青云下布五藏之外，出于左肩，神首戴日光。五咽中帝，黄云下布脾胃之中，出于脐中。六咽玄一老子，亦黄云，下降阴茎之中，出于玉龟之外，顺时吐息。

诵玉经。

大洞玉经曰

玄洲绝三津，羽景大无庭，回霄飞重漠，委化混万精，五云五行炁郁绝空，七霞七星光落圆明，朗朗幽寥子，梵昌心神济黄宁，五老挥绛华，散香携五灵，金质濯帝川，绿烟蔼流琼，神拔三涂积，仙胎缠兆形。

太上玉清真王祝曰

上宝月九真，日曦变玉室，呼吸紫微，大混帝一，八烟藂生，百灵明威，九魂离合，三光同晖，天皇上丹神在元，紫烟霏霏，五神奉图，始命不亏，变入九宫，被服朱衣，腰佩虎章，流云繡帔，帷帐玳瑁，五色徘徊，日月照察，挟以东西，神庭内醴，以除渴饥，三五复反，转藏营玑，周流太一，生均二仪。

高上神霄玉清王祝曰

太一变六合，五神哺泥丸，七精灭三涂，血尸塞下关，三衿对帝真，拔斫胞树根，丈人号神宗，同心元素君，天皇入太清，五老捧符文，世世登羽宫，重华日中轩，元王始明精，固我本命门，保弼下元卿运绿炁，归上谷下玄弼卿字，玄景映形神，朝跻太上轮，日月并玉衿，年随二景分，丹书玉堂内，位为天上君上清仙，左携羽台子，右提金颜仙。

毕，乃口微祝曰

天上内音，开神华，太纪元。

地上外音，三毒除，福乘回。

大洞五帝消魔玉符

诀曰：当黄书白绹，佩之，存呼五帝内讳名字，镇我全身之户。乃叩齿五通，咽液五过。



太元晨中君峨眉洞室玉户太素君道经第三十八

“太元晨中君峨眉洞室玉户太素君道经第三十八

上清大洞真经卷之六

茅山上清三十八代宗师蒋宗瑛校勘

帝卿章

谨请泥丸上一帝卿肇勒精，字仲玄生；绛官中一辅卿中光坚，字四化灵；黄庭下一弼卿归上明，字谷下玄。三神卫兆入帝一之室，保于九天之录，死户灭绝，超登帝一。

真思泥丸上一帝卿肇勒精、绛官中一辅卿中光坚、黄庭下一弼卿归上明，三真之炁，混合青白黄三色之云，罩于顶上，乃默呪曰：

三真生太无，玉户映晨霞，太素洞元虚，丹灵森朱阿，回神九重府，内唱发琼华，百关纳津液，停年秀三柯，我身腾玉清，七祖离幽都，长保不终劫，万世为仙家。



次思三色云炁从兆泥丸中入，兆乃口吸神云，咽津三过，结作三神，下本身三官本命帝室，出自心下一寸，顺时吐息。

诵玉经。

太洞玉经曰

太无太素，洞景幽玄，人生天形，上道泥丸，九宫森罗，丹楼丹田宫五间，婴儿六炁，盈润清渊，太一凝血，司命镇魂，桃康备魄，养光命门，公子携精，洞阳回神，九真保骨，太素理真，百节万液，千门开关，上憩日月，五帝九晨，淡寂五藏，华生玉根，胃宫朱肠，生血通源，三命长生，营护太全，兆得神名，升为仙君。

高上太素玉清王祝曰

帝一混九玄，太素五华精，宝羽宴玉堂，八风扇太明，高上乘元景，凌梵履昌灵，七化紫户下，九混五帝清，体生六色曜，金映流神形，感濯元炁内，金书玉皇庭。

太上晨景玉清王祝曰

灵云始分，白炁郁素，混会九玄，三五流化，帝一解形，超登霄路，太一呼吸，五华坚固，司命主日中，白元司日暮，日中静心，心玄眇悟，夕隐泥丸，百神宣布，二宫可以长生，心脑可以长度。

毕，乃口微祝曰

天上内音，凌昌玉，百涂君。

地上外音，得合契，登神乡。

大洞三一帝卿消魔玉符

诀曰：当朱书黄绡佩之，存呼三卿内讳名字，镇我本命，卫我帝室，固录九天，死户绝灭。乃叩齿三通，咽液三过。



九灵真仙母青金丹皇君道经第三十九

“九灵真仙母青金丹皇君道经第三十九

上清大洞真经卷之六

茅山上清三十八代宗师蒋宗瑛校勘

帝一尊君章

谨请大洞帝一太素尊灵，父宁母精，二合双成，百真大混，一徊始生，身结入烟，变胎元婴，日月宝光，洞我躯形，太一在上，与帝合并，泥丸保玉，五藏华明，长合日月，手执洞经，位为仙公，晨升上清，三十九章，金符羽庭。

真思大洞帝一尊君父宁在真炁，五色紫云之炁，罩于顶上，乃默呢曰：

九灵通妙化，金仙混扶桑，帝一变日神，合灵西丹皇，上为胎仙母，下号理神宗，曜景绝云杪，萧萧紫微宫，为我执命籍，保真三素房，妙景空中降，炼我反婴蒙，七祖绝苦源，超逸九福堂。



次思五色紫云从兆泥丸中入，兆乃口吸神云，咽津十二过，结作一神，身披五彩紫白霞圆光轮，神在光内，下布一形之内，散炁九孔之中，聚在舌尖之上，顺时吐息。

诵玉经。

大洞玉经曰

西元昆仑山九灵炁，金丹流云宫王母宫名，上极旋曜杪，晖景太霞中，动回九天斗轮，静沉八流刚水轮底，室有胎仙母，携衿太帝皇，玄一玄一老子灵时生，三老素牢张，左把兆符籍，右携理神宗，同登琳龙阙，稽首玉清房，拔弃死灭根，养形三五中，七祖解尸结，受福明朱方。

高上神霄玉清王祝曰

太上洞明，飞景九天，结精凝炁，化炁变神，司命混合，散形亿分，千乘火甲，万骑扬旛，俱与太一，上造帝先，伯无帝君起非帝佐，仲成曲文丹田神，一合我炁，再合我神，三合我魄，四合我魂，五合我精，六合我身，我身六合，洞灵

启真，八景虚驾，三素浮轮，我与帝一，俱升玉晨，重华累枝，混合天仙，身有道籍，世有生根，金简羽符，名刊日轩，所愿即从，天禄诜诜，所向如心，万福盈门，常存太上，帝一泥丸，雌雄混化，百灵缠绵，读经万遍，云驾来迎，携宴五帝，日月九君，得为仙公，上清真人。


毕，乃口微祝曰：

天上内音，极炁寿，受乘明。

地上外音，合伯衿，驾变劫。

大洞帝一尊君消魔玉符

诀曰：当紫书黄缙，佩之，存呼尊君内讳名字，徊风混合，结成道真，把篆符籍，度命长延，千变万化，升入九玄，七祖解脱，反胎三天，与帝同休，举形皆仙。乃叩齿三十九通。咽液三十九过。



徊风混合帝一秘诀

兆诵咏玉经三十九章，都毕，叩齿三十九通，便闭两目，存此百神变成白炁，混沌如白云之状，从玄虚中来入兆口中，郁郁良久。觉白炁从下部出，又从玉茎中出，从两脚底出，又从两手心出，冠缠一体，上下手足，混合一身，与白炁同烟，上下不相见也。良久，白炁忽复变成紫云郁郁，从口中入头中，并五藏之内，充满腹内。良久，紫云又从两脚底、两手心、下部玉茎中出，冠缠一体，郁然上下，与紫云合形，不相见也。须臾，存见紫云之炁充满左右，及一室内。又存见口中出风炁，吹扇紫云之烟，乃徊转，更相缠绕，忽结成一真人，男形，如始生小儿，身长四寸，号曰大洞帝一尊君，名父宁在，字合母精延，守兆死关，众神徊风混化，共成此帝一尊君。其尊君来入兆口中舌下，迳上升入紫房六合宫中，平坐向外。尊君左手把兆五符，右手把兆五籍。尊君口左边有日光，径九分；口右边有月光，径一寸。尊君口吐徊风之炁，吹此日月之光，皆郁郁变成白色，或成紫色。令光炁下入兆五藏六腑百节，一身之内，洞彻朗然，内外如白日之状。良久，忽然忘身。事讫，神炁已定，觉身体轻清，精神开爽。乃叩齿三十九通，两手拭面，再说颂曰：

太上教授我，读诵洞真经，玉音含金商，上充太无庭，解结散幽祸，拔脱七祖灵，返胎会南宫，世世有玉名，三涂灭罪根，轮转升上清。

诵经毕，复炉，祝曰：

具位臣某，吉日入靖，修诵《上清大洞三十九章真经》已毕，当愿仙灵仙官、金童使者、五帝、五岳神仙真人、三天正神、左右龙虎君、天仙地仙、五灵香官、侍经威神，当令臣召致十方正炁，自然生金液丹碧芝英，九玄玉真交会斋堂之所，同灌臣身，令臣学道得道，求仙得仙，飞行太空，腾景九天，玉童玉女侍卫香烟，关奏臣向来所启所愿，迳达高真玉皇上道万圣御前。

复毕，心拜四方，乃起。